

## **Informacija o obavezi uspostavljanja jedinstvene bazu podataka/ Centralni registar odobrenih kontribucija sa fiskalnim pokazateljima**

Ova informacija je sačinjena kako bi se Vlada upoznala sa presjekom stanja po pitanju obaveze plaćanja finansijskih obaveza (kontribucija) Crne Gore po osnovu članstva u međunarodnim organizacijama, a sa konačnim ciljem formiranja vođenja precizne evidencije o ovim obavezama.

Izazov u objedinjavanju informacija i formiranju jedinstvene baze podataka o svim finansijskim obavezama i pravnom osnovu iz kojeg te obaveze proizilaze, prepoznat je u izvještaju o reviziji uspjeha „*Efikasnost planiranja i povraćaja sredstava po osnovu kontribucija*” i pratećim preporukama Državne revizorske institucije (DRI) koji su upućeni Ministarstvu vanjskih poslova.

Ključna preporuka zbog koje je ova informacija sačinjena je:

- *Preporučuje se Ministarstvu vanjskih poslova da uspostavi jedinstvenu bazu podataka/ Centralni registar odobrenih kontribucija sa fiskalnim pokazateljima*

U odgovoru DRI, Ministarstvo je prihvatilo preporuku i obavezalo se da će uspostaviti jedinstvenu bazu podataka/ Centralni registar odobrenih kontribucija sa fiskalnim pokazateljima i da će ovu aktivnost započeti u 2020. godini. Ministarstvo vanjskih poslova je u obavezi da DRI izvijesti o realizaciji ovih aktivnost do 20. aprila 2021. godine.

Ministarstvo vanjskih poslova je do sada redovno i detaljno, vodilo evidenciju obaveza koje su u njegovoj nadležnosti za plaćanje, dok su svi resori samostalno vodili evidenciju o svojim obavezama. **Obaveza resora proizilazi i iz člana 24 Zakona o zaključivanju i izvršavanju međunarodnih ugovora, kojim je regulisana obaveza svih ministarstava da prate izvršavanje međunarodnih ugovora i pravovremeno obavještavaju Vladu.**

**Ministarstvo vanjskih poslova uglavnom ima pregled samo za one međunarodne organizacije koje zahtjev za plaćanje kontribucije dostavljaju Vladi Crne Gore posredstvom ovog resora.** Većinu ostalih računa za plaćanje resori dobijaju direktno i obaveze izmiruju u vremenskim okvirima koji nijesu poznati Mnistarstvu vanjskih poslova. Prethodnih godina, u nekoliko navrata, bilo je pokušaja od strane Ministarstva vanjskih poslova da se od nadležnih resora zatraži spisak svih finansijskih obaveza i iznosa koje uplaćuju, ali bez uspjeha. **Zaključeno je da bi koordinacija ovog tipa zahtijevala koordinaciju generalnih sekretarijata svih resora u Vladi, uz postizanje dogovora o matrici izvještavanja i razmjene informacija, kao i načinu vođenja evidencije.**

nKako bi odgovorili na preporuke Državne revizorske institucije **potrebno je napraviti jedinstvenu bazu multilateralnih sporazuma i međunarodnih organizacija kojima je**

**Crna Gora pristupila, kao i drugih osnova iz kojih proizilazi obaveza plaćanja godišnjih ili drugih redovnih finansijskih obaveza.** Ovaj postupak podrazumijeva izradu smjernica/procedure kojom će se utvrditi vođenje evidencije i proces planiranja, realizacije i izvještavanja po osnovu obaveza/izdataka koje proističu iz članstva u međunarodnim organizacijama i zaključenih međunarodnih ugovora/sporazuma (što je takođe jedna od preporuka DRI). Dodatno, u cilju uspostavljanja jedinstvene baze podataka/Centralnog registra, neophodno je donijeti propis kojim će se na državnom nivou urediti vođenje evidencije i procesa planiranja, realizacije i izvještavanja po osnovu obaveza/izdataka koje proističu iz članstva u međunarodnim organizacijama i zaključenih međunarodnih ugovora/sporazuma.

Iako su ove preporuke izvještajem naslovljene na Ministarstvo vanjskih poslova, nužno je formirati mrežu odgovornih kontakata (radno tijelo; interresorno tijelo) u sekretarijatima svih relevantnih resora Vlade, kako bi se svi direktni akteri, resori nadležni za određene oblasti, mogli uključiti u formiranje ovakve vrste Centralnog registra. Bez jasne i temeljne koordinacije generalnih sekretarijata svih resora u Vladi, nije moguće vršiti traženu evidenciju.